

Naartuersittarneq pillugu
siunersiueqatigiittartut piffissami 1.
oktober 2024-imiit 1. februar 2025-
imut nakkutilliinerinit
nalunaarusiaq

Naartuersittarneq pillugu isumalioqatigiit

KALAALLIT NUNAAT

20. februar 2025

Uannga allanneqartoq: mono

Naartuersittarneq pillugu siunersieqatigiittartut piffissami 1. oktober 2024-imiit 1. februar 2025-imut nakkutilliinerinit nalunaarusiaq

Naartuersittarneq pillugu isumalioqatigiit

A. Naartuersittarneq pillugu isumalioqatigiit nakkutilliinissamik piginnaasaqarnerat

Naartuersinnissaq pillugu aalajangiinerni assigiiartumik periaaseqartoqarnissaa qulakkeerniarlugu, Naartuersinneq pillugu Kalaallit Nunaanut inatsit nr. 232, 12. juni 1975-imeersoq malillugu Kalaallit Nunaanni Naartuersittarneq pillugu isumalioqatigiit, naartuersittarneq pillugu siunersieqatigiittartut Kalaallit Nunaanni sulinerat nakkutilliiffisarpaa. Nakkutilliinermik pisussaaffiup saniatigut naartuersittarneq pillugu isumalioqatigiit nunap immikkoortuini assigiinngitsuni naartuersinnissamut akuersissutit itigartissutillu amerlassusaasa malinnaaffiginissaannut periarfissaqarput.

Kalaallit Nunaanni naartuersinneq pillugu suliassa qarfirmi inatsisiliernerit, aamma taamaammat inatsimmi aalajangersakkat malinneqarnerisa nakkutigineqarnerat, Indenrigs- aamma Sundhedsministereqarfiup pisussaaffigaa.

“Kalaallit Nunaanni naartuersittarnerit nakkutilliiffigineqarnerannut sulisaaseq”, ulloq 2. oktober 2024-imi Indenrigs- aamma Sundhedsministereqarfiup aalajangigaa, malillugu Naartuersittarneq pillugu isumalioqatigiit nakkutilliisarpur.

B. Aalajangiinissamut tunngaviit

- Naartuersittarneq pillugu siunersieqatigiittartut aalajangiinerni, noqqaassuteqarnermit qaammatit 6 kingulliit iluannit sumiiffinni naartuersittarneq pillugu siunersieqatigiittartunit nakorsaanerup tigusimasaanit, nalunaarutigineqarsimasunit $\frac{1}{4}$ -it nassiuunneqaqqullugit ukiup affakkuutaarlugu Naartuersittarneq pillugu isumalioqatigiit Nakorsaanermut noqqaassutigisarpaat.
- Siunersieqatigiinnernit ukiup affakkuutaartumik misissuinerit taakku saniatigut, siunersieqatigiittartut isumalioqatigiinnut ingerlaavartumik imaluunniit erseqqinnerusumik taasanik sulianik misissugassanik sulianik nassiusseqqullugit, Naartuersittarneq pillugu isumalioqatigiit naalakkiuteqarfigisinnaavaat.
- Tamatuma saniatigut suliat suliarineqarsimasut amerlassusaat taakkulu suussusaat pillugit paasissutissanik nassiusseqqullugit Naartuersittarneq pillugu isumalioqatigiit siunersieqatigiittartut qinnuigisinnaavaat.

Tassani naartunermit sapaatit akunnerisa 12.-saata qaangiunnerani naartusup naartuersinnissaminik kissaateqarsimanera pillugu suliat, Naartuersittarneq pillugu isumalioqatigiit taamaallaat suliarisarpai.

C. Piffissaq nakkutilliiffiusoq 1. oktober 2024 –imiit 1. februar 2025-imut

“Kalaallit Nunaanni naartuersittarnerit nakkutilliiffineqarnerannut sulisaaseq”-imi immikkoortoq 1 naapertorlugu, piffissami 1. oktober 2024-imiit 1. februar 2025-imut siunersieqatigiittartut aalajangiineri tamaasa nassiteqqullugit Naartuersittarneq pillugu isumalioqatigiit Nakorsaaneq ulloq 6. februar 2025 noqqaassuteqarfigisimavaat. Siunersieqatigiittartut aalajangiineri Naartuersittarneq pillugu isumalioqatigiinnit ulloq 10. februar 2025 tiguneqarsimapput.

D. Nakkutilliinerup annertussusaa

Nakkutilliineq suliarineqarsimasoq, ima suliarineqassasoq, piffissami 1. oktober 2024-imiit 1. februar 2025-imut siunersieqatigiittartuni suliat tamarmik misissorneqarnissaannut nassiunneqassasut, Naartuersittarneq pillugu isumalioqatigiit Siulittaasuata nalilersimavaa. “Kalaallit Nunaanni naartuersittarnerit nakkutilliiffineqarnerannut sulisaaseq” 2. oktober 2024 saqqummiunneqarsimammat, oktober 2024-imit siusinnerusumut piffissaliinissaq Naartuersittarneq pillugu isumalioqatigiit kissaatigisimanngilaat.

Piffissami 1. oktober 2024-imiit 1. februar 2025-imut siunersieqatigiittartut aalajangiineri 12 Naartuersittarneq pillugu isumalioqatigiit tigusimavaat. Suliat kinaassutsimik ilisarnarunnaarsakkat taakku tigunerisa kingorna, suliat nakkutilliineri normumik nutaanik Naartuersittarneq pillugu isumalioqatigiit tunisimavaat: T2024-25/01 – T24-25/12.

E. Piffissami nakkutilliiffiusumi siunersieqatigiittartut aalajangiineri tiguneqarsimasut taakku 12 pillugit pingaarnertut allaaserinninneq

Piffissami nakkutilliiffiusumi siunersieqatigiittartut aalajangiineri 12 Naartuersittarneq pillugu isumalioqatigiit tigusimavaat. Qulaani taaneqartut suliat taakku 12 piffissami 1. oktober 2024-imiit 1. februar 2025-imut siunersieqatigiittartut aalajangiinerinut tamanut takussutissaapput.

Suliat taakku 12 nunap ilaanut ima agguarneqarsimapput:

- 4 Nuummiit
- 2 Tasiilamiit
- 3 Kalaallit Nunaata Avannaaniit (2 Aasiannit aamma 1 Ilulissanit)
- 2 Sisimiunit
- 1 Qaqortumit

Sulianit 12-nit 4 meeqqanut (18-it inorlugit ukiulinnut) naartusunut tunngassuteqarput.

Kingusissukkut naartuersissinnaanermut akuersissut suliani 12 tamani tunniunniunneqarpoq.

Skiimap tamanut atugassiap Nakorsaannermit suliarineqarsimasup tamatigut atorneqarnissaa pillugu Naartuersittarneq pillugu isumalioqatigiit siunersieqatigiittartunut 2022-imi piumasaqaataa massakkut atorneqartoq, tamannalu siunersieqatigiittartut sulinerannut immini assigiisaartumik sulisaatsimik pilersitsisimasoq, sulianut taakkununga 12-nut tamanut Naartuersittarneq pillugu isumalioqatigiit maluginiarpaat.

F. Siunersieqatigiit aalajangiineri, inatsisit atuuttut, periaatsit ilusiliinissamullu piumasaqaatit sulisaatsimi aalajangerneqartut aamma

uppernarsaatit attuumassuteqartut naapertorlugit aalajangerneqarsimanersut pillugit naliliineq

Suliat 7 (60%) qanoq itsilluguluunniit inatsisinut atuuttunut, periaatsinut ilusiliinissamullu piumasaqaatinut sulisaatsimi aalajangerneqartunut aamma uppernarsaatinik attuumassuteqartunik uppernarsaasiinissamik naammassinnittut, Naartuersittarneq pillugu isumalioqatigiit isumaqarput.

- Sulianit 7-nit taakkunannga 4 Nuummeersuupput, 1 Ilulissaneerluni aamma 2 Tasiilameersuullutik.

Suliat 4 sinneruttut (40%) annerusumik minnerusumilluunniit inatsisinut atuuttunut, periaatsinut ilusiliinissamullu piumasaqaatinut sulisaatsimi aalajangerneqartunut aamma uppernarsaatinik attuumassuteqartunik uppernarsaasiinissamik naammassinninngitsut, Naartuersittarneq pillugu isumalioqatigiit isumaqarput.

Kisianni suliani taakkunani kukkunerit assigiinngitsorujussuupput, aamma tamanna tunngavigalugu ataani taaneqartunik Naartuersittarneq pillugu isumalioqatigiit suliat kukkunillit erseqqinnerusumik immikkoortiterneqarneranik suliaqarsimavoq.

F.1 Siunersieueqatigiittartut aalajangiineri pingaarutilinnik kukkuneqartut

Suliaq 1 siullermik pingaarutilinnik kukkunernik imaqarpoq. Suliaq taanna T24-25/08-itut suussusersineqarpoq.

Suliaq taanna oqaaseqaateqarfigineqarnissamut pissutissaqartitsisutut Naartuersittarneq pillugu isumalioqatigiit siulittaasuannit nalilerneqarpoq, aamma taamaammat nakkutilliisut ullormi 25. Februar 2025-imi ataatsimiinneranni, Kalaallit Nunaanni naartuersittarnerit nakkutilliiffigineqarnerannut sulisaatsimi immikkoortoq 2-mut naapertuuttumik oqallisigineqarsimalluni.

Meeraq naartusoq pineqarpoq, piumasaqaatigineqartutut naartuersinnermi naartuersittarneq pillugu siunersieueqatigiittartut suliarineqarnissaannaassappat, naartunermini sapaatit akunnerisa 12.-saat qaangersimavai.

Akuliunnermut angajoqqaatut oqartussaassuseqartup uppernarsarneqarsinnaasumik akuersissuteqarsimannginnera, kukkuneruvoq pingaarutilik. Akuersissutit pissarsiariniarneqarsimavera nalunaaqutserneqarsimavoq, kisianni akuersissuteqarneq pillugu paasissutissanik sulii allanik suliaq imaqqanngilaq – soorlu aamma akuersissuteqarneq immi suliami nassaassaangitsoq.

Peqqinnissaqarfik taamaalluni angajoqqaatut oqartussaasut akuersiteqqaarnagit meeqqami kingusissukkat naartuersitsinnermik suliaqarsimavoq, aamma taamaalluni naartuersinneq pillugu Kalaallit Nunaannut inatsimmi nr. 232-imi, 12. juni 1975-imeersumi § 6, imm. 1 unioqutissimallugu.

§ 6, imm. 1 ima oqaasertaqarpoq:

Arnaq 18-it inorlugit ukioqarpat imaluunniit inummut tunngatillugu nammieersinnaassusiagaasimappat, angajoqqaatut oqartussaasut, angajoqqaatullu akisussaataitaasoq, tamarmik immikkut, noqqaassuteqarnermi akuersissuteqassapput.

Akuliunnermi tassani, siunersieueqatigiittartut suliamik suliarinnittut kukkusummik pingaarutilimmik kukkussuteqarsimasut, tamatuma kinguneranik Naartuersittarneq pillugu isumalioqatigiissitat isumaqarput.

Naartuersittarneq pillugu isumalioqatigiissitat suliamut tassunga ima oqaaseqaateqarput:

Suliami uani siunersieueqatigiittartut naartuersinneq pillugu inatsimmik unioqutitsisimasut Naartuersittarneq pillugu isumalioqatigiit isumaqatigiissut isumaqarput, tassungalu atatillugu siunersieueqatigiittartut suliamik suliarinninnerat sakkortuumik isorisariaqartutut isigisariaqarnera oqaatigalugu.

Isumalioqatigiit ilungersunartorujussuarmik isorinninnerat aamma siunissami siunersiueqatigiittartut suliaqarnerannut malittarisassat paasineqarnissaat qulakkeerniarlugu, matumani meeqqat pillugit suliat ingammik ilanngullugit, siunersiueqatigiittartunut pineqartunut Nakorsaanerup attaveqarnissaa piumasaqaatigineqarpoq.

F.2. Siunersiueqatigiittartut aalajangiineri kukkunillit

Suliat sisamat siullermik kukkunernik erseqqissunik allatut suussusilinnik imaqarput, taakkuli taamaattoq pingaaruteqartutut suussusilerneqarsinnaanngillat.

Suliami 1-imi, T24-25/05-imi, kukkunerit tassaapput siunersiueqatigiittartut ilaasortaannit ataatsimit atsiornepup amigaataanera aamma Kalaallit Nunaanni naartuersinneq pillugu suliat suliarineqartarnerat pillugu kaajallaasitami nr. 2-mi, 19. juni 1975-imeersumi § 7, imm. 2 malillugu kingusissukkut naartuersinnermut pissutaasoq pisariaqartinneqartoq ima erseqqinngitsigisumik taaneqarsimavoq, pissutaasoq pissutsinik, arnamut peqqissutsikkut navianartorsiortitsinnermut, naartuersittarneq pillugu inatsimmi § 3, imm. 2 malillugu naartunermi piffissami tassani akuliunnerup kinguneranik navianartorsiortitsinnermik annertusisitsisumut pissutaatinneqarnissaanut piviusumik naleqquttumillu isumaqarani.

Suliaq aamma taanna nakkutilliisut ataatsimiinneranni ulloq 25. februar 2025-imi pisumi piviusumik eqqartorneqarpoq.

Suliami tassani siunersiueqatigiittartut suliamik suliarinninnerminni ilungersunartumik kukkussuteqarsimasut, Naartuersittarneq pillugu isumalioqatigiit tamatuma kingunerisaanik isumaqarput.

Naartuersittarneq pillugu isumalioqatigiit suliaq taanna pillugu ima oqaaseqateqarput:

Siunersiueqatigiittartut suliami tassani suliamik suliarinninnerminni ilungersunartorujussuarmik kukkussuteqarsimasut, aamma siunersiueqatigiittartut tassunga atatillugu suliamik suliarinninnerat isorisariaqartutut isigisariaqartoq. Naartuersittarneq pillugu isumalioqatigiit isumaqatigiissut isumaqarput.

Naartuersittarneq pillugu isumalioqatigiinni ilaasortap, naartuersittarneq pillugu inatsimmi § 4, imm. 3-mi sulinnermut- isumaginninnermullu pisortaq sinnerlugu ilaasortaasup, periarfissaq siulleq atorlugu kommuninik ataatsimeeqateqarnermini isumaginninnermi- aamma imaluunniit peqqissaanermi ikiortit, naartuersinneq pillugu inatsimmi § 4, imm. 1- malillugu naartuersittarneq pillugu sumiiffinni siunersiueqatigiittartuni peqataasinnaasut, akuersissuteqarnermut pissutaasut naleqquttumik, eqqortumik aamma peqqissaartumik taaneqarnissaat pillugit erseqqissaavigissagai, Naartuersittarneq pillugu isumalioqatigiit inappaat.

Ilaatigut isumalioqatigiit isorinninnerat oqaatiginiarlugu ilaatigullu siunersiueqatigiittartut suliaqarneranni uppersaasersuinnissaq pillugu piumasaqaatit paasineqarnissaat qulakkeerniarlugu, siunersiueqatigiittartunut pineqartunut Nunatsinni Nakorsaanerup attaveqarnissaa inassutigineqarportaaq.

Suliani taakkunani pingasuni, T24-25/04-imi, T24-25/11-imi aamma T24-25/12-imi, siunersiueqatigiittartut ilaasortaat tamarmik siunersiueqatigiittartut aalajangiineranni atsiorsimannginnerat kukkuneruvoq. Taamaallluni suliani taakkunani pingasuni siunersiueqatigiittartut aalajangiinerannut atugassami skiimami akuerisaasumi atsiornernit pingasunit piumasaqaatigineqartunit ataaserpiaq amigaataavoq.

Taamaallluni suliat taakku, siunersiueqatigiittartut suliani piviusuni taakkunani aalajangiinissamut piginnaasaqarsimanngitsutut isikkoqarput, kisianni uppersaasersuinnermi puigornerit pineqarnerattut isigineqarnissaat, Naartuersittarneq pillugu isumalioqatigiit siullermik toqqarpaat. Kisianni aamma kukkunernut taamaattut ilungersunartorujussuarmik suussuseqartutut Isumalioqatigiit isiginiarpaat.

Nakkutilliinerit pillugit ataatsimiinnermi suliat taakku pingasut misissorneqarnissaat piviusumik pisariaqanngitsoq, Naartuersittarneq pillugu isumalioqatigiit isumaqarput. Suliat taakku pingasut nunap immikkoortuani peqqinnissaqarfinit aamma taakkunannga marlunnit suliarineqarsimasut, Naartuersittarneq pillugu isumalioqatigiit aamma maluginiarpaat.

Sulianut taakkununga pingasunut Naartuersittarneq pillugu isumalioqatigiit ima oqaaseqaateqarput:

Naartuersittarneq pillugu siunersieqatigiittartuni ilaasortat peqataasimasut atsiorderisa amigaataanerit sulianik suliarinninnermi ilungersunartumik kukkunertut isigineqartariaqartoq, taamaattoqarneralu siunersieqatigiittartut erngerlutik iluarsissagaat Naartuersittarneq pillugu isumalioqatigiit isumaqatigiissut isumaqarput, tassungalu atatillugu siunersieqatigiittartut sulianik taakkuninnga suliarinninnerat amigaateqartutut isigisariaqartoq Naartuersittarneq pillugu isumalioqatigiit oqaaseqarput.

Isumalioqatigiit isorinninnerat aamma siunissami siunersieqatigiittartut suliaqarnerannut malittarisassat paasineqarnissaat qulakkeerniarlugu, siunersieqatigiittartunut pineqartunut marlunnut Nakorsaanerup attaveqarnissaa piumasaqaatigineqarpoq.

G. Inerniliineq

Suliani pingaarutilinnik imaluunniit annertunerusunik kukkunilinni, kukkunerit annertussusaat pillugit naleqqiussineq 40%-iusoq (suliat tallimat) qaffasissorujussuusoq Naartuersittarneq pillugu isumalioqatigiit isumaqarput.

Nakorsaanermit piumasaqaatit piviusut saniatigut, naartuersittarneq pillugu siunersieqatigiittartut suliaannut piumasaqaatit, matumani ingammik uppersaasarsuissamut piumasaqaatit ilanngullugit, nalinginnaasumik ukkatarineqassasut, isumalioqatigiit innersuussutigaa.